



REPUBLIKA E SHQIPËRISË  
KËSHILLI I MINISTRAVE

V E N D I M

Nr. 50, datë 22.1.2025

PËR

**MIRATIMIN E STANDARDEVE PËR ZONAT DHE PARCELAT  
E TOKËS, NË TË CILAT DO TË LEJOHET KULTIVIMI I BIMËS  
SË CANNABIS-IT PËR QËLLIME MJEKËSORE DHE INDUSTRIALE**

Në mbështetje të neneve 100 të Kushtetutës, të shkronjës “c”, të pikës 2, të nenit 9, të ligjit nr.61/2023, “Për kontrollin e kultivimit dhe përpunimit të bimës së *cannabis*-it dhe prodhimit të nënprodukteve të saj për qëllime mjekësore dhe industriale”, me propozimin e ministrit të Bujqësisë dhe Zhvillimit Rural, Këshilli i Ministrave

V E N D O S I:

1. Në këtë vendim, termat e mëposhtëm kanë këto kuptime:

- a) “**Standardet**”, tërësia e kërkesave dhe kritereve që duhet të kenë zonat dhe parcelat e tokës për kultivimin e *cannabis*-it për qëllime mjekësore dhe industriale;
- b) “**Parcelë e tokës**”, sipërfaqe e kufizuar e tokës, përfituar me aktin e fitimit të pronësisë, e cila do të përdoret për kultivimin e bimës së *cannabis*-it për qëllime mjekësore ose industriale, në zbatim të përcaktimeve të ligjit nr.61/2023, “Për kontrollin e kultivimit dhe përpunimit të bimës së *cannabis*-it dhe prodhimit të nënprodukteve të saj për qëllime mjekësore dhe industriale”;
- c) “**Ambient i mbrojtur**”, një mjedis kultivues dhe i mbuluar, i cili krijon kushte të favorshme përritjen e bimëve, duke mbrojtur ato nga ndikimet atmosferike të jashtme, si ndryshimet ekstreme të temperaturës, era apo reshjet e shiut. Ky ambient lejon depërtimin e rrezatimit diellor dhe

zakonisht përfshin struktura, si sera ose tunele plastike, që ofrojnë një shkallë të caktuar kontrolli mbi temperaturën, lagështinë dhe dritën, në përputhje me udhëzimet e praktikat e mira të bujqësisë dhe të mbledhjes (GACP) të Agjencisë Evropiane të Barnave;

- c) “**Ambient i mbyllur**”, një mjedis plotësisht kultivues, i mbuluar dhe i izoluar nga ndikimet e jashtme atmosferike, i cili ofron kushte të favorshme për rritjen e bimëve, pa depërtimin e rrezatimit natyror diellor. Ky lloj ambienti përdor ndriçim artificial e sisteme kultivuese për parametrat, si: drita, lagështia, temperatura, ventilimi dhe për ndikimin e faktorëve të tjera të jashtëm, duke siguruar kushte optimale për kultivimin, në përputhje me udhëzimet e praktikat e mira bujqësore dhe të grumbullimit (GACP) të Agjencisë Evropiane të Barnave;
- d) “**Zonë**”, tërësia e parcelave të tokës, ku kultivohet bima e *cannabis*-it për qëllime mjekësore ose industriale;
- dh) “**Terren kultivues ose substrakt kultivues**”, një material ose përzierje materialesh, natyrore ose të prodhuara, që siguron mbështetje fizike dhe furnizim me ushqyes për rritjen e bimëve, që mund të përfshijë tokë natyrale, torfë, perlit, vermiculit, fibra kokosi apo substrakte të tjera, që krijojnë kushte të përshtatshme për rritjen e bimëve në një ambient kultivues, duke lejuar rregullimin e lagështisë, ajrimit dhe ushqyesve.

2. Standardet për zonat dhe parcelat e tokës për kultivimin e bimës së *cannabis*-it për qëllime mjekësore janë:

- a) parcelat e tokës, pjesë e njësisë së prodhimit, që nuk mund të shtrihen brenda kufirit të zonave:
  - i. të mbrojtura e të zonave me përparësi zhvillimin e turizmit, të shpallura si të tilla me vendim të Këshillit të Ministrave;
  - ii. të pyjeve, kullotave dhe livadheve;
  - iii. ushtarake;
  - iv. të përcaktuara si sistem urban në dokumentet e planifikimit vendor të territorit.
- b) parcelat e tokës, pjesë e njësisë së prodhimit, që duhet të jenë në largësi prej të paktën 3 (tre) km, në rrugë ajrore nga parqet e bletëve, të miratuara sipas legjislativit përgjegjësi;
- c) parcelat e tokës, pjesë e njësisë së prodhimit, që duhet të jenë në largësi prej të paktën 3 km në rrugë ajrore nga zonat ushtarake dhe pasuritë/pronat në përgjegjësi administrimi të Ministrisë së Mbrojtjes;
- c) përqendrimi i metaleve të rënda në tokë apo në terrene kultivuese (substrakte kultivuese), ku kultivohet *cannabis*-i për qëllime mjekësore, që nuk duhet të kalojë vlerat maksimale, të përcaktuara në shtojcën 1, që

- i bashkëlidhet këtij vendimi dhe është pjesë përbërëse e tij;
- d) toka apo terrenet kultivuese (substraktet kultivuese), ku kultivohet *cannabis*-i mjekësor, që duhet të plotësojnë standartet e parashikuara në udhëzuesit për praktikat e mira bujqësore e të grumbullimit të Agjencisë Evropiane të Barnave dhe Organizatës Botërore të Shëndetësisë, si dhe në standartet e parashikuara nga Organizata Ndërkombëtare për Standardizim (ISO).

3. Standardet për zonat dhe parcelat e tokës për kultivimin e bimës së *cannabis*-it për qëllime industriale janë:

- a) parcelat e tokës, pjesë e njësisë së prodhimit, që nuk mund të shtrihen brenda kufirit të zonave:
- të mbrojtura dhe të zonave me përparësi zhvillimin e turizmit, të shpallura si të tilla me vendim të Këshillit të Ministrave;
  - të pyjeve, kullotave dhe livadheve;
  - ushtarake;
  - të përcaktuara si sistem urban nga dokumentet e planifikimit vendor të territorit.

- b) parcelat e tokës, pjesë e njësisë së prodhimit, që duhet të jenë në largësi prej të paktën 3 (tre) km në rrugë ajrore nga parqet e bletëve, të miratuara sipas legjislacionit për bletarinë;
- c) parcelat e tokës, pjesë e njësisë së prodhimit, që duhet të jenë në largësi prej të paktën 3 (tre) km në rrugë ajrore nga zonat ushtarake dhe pasuritë/pronat në përgjegjësi administrimi të Ministrisë së Mbrojtjes.

4. Në rastet kur, për ushtrimin e aktivitetit parashikohet kryerja e ndërhyrjeve ndërtimore në parcelën e tokës, pjesë e njësisë së prodhimit, ndërtimi kryhet sipas përcaktimeve të legjislacionit të planifikimit dhe zhvillimit të territorit.
5. Në rastet, kur parcela e tokës përdoret për kultivimin e *cannabis*-it për qëllime mjekësore apo industriale, ajo duhet të jetë e pajisur me aktin e fitimit të pronësisë, në zbatim të përcaktimeve të Kodit Civil dhe të ligjit nr.111/2018, “Për kadastrën”.
6. Standardet e parashikuara në pikat 2, shkronjat “a”, nënndarja “iv”, dhe “b”, e 3, shkronjat “a”, nënndarja “iv”, dhe “b”, të këtij vendimi, nuk aplikohen kur kultivimi kryhet në ambiente të myllura.
7. Ngarkohen Ministria e Bujqësisë dhe Zhvillimit Rural, Ministria e Shëndetësisë dhe Mbrojtjes Sociale, Agjencia Kombëtare e Kontrollit të

*Cannabis-it* dhe subjektet e licencuara dhe me leje për zbatimin e këtij vendimi.

Ky vendim hyn në fuqi pas botimit në "Fletoren zyrtare".

## KRYEMINISTRI

### EDI RAMA

Në mungesë dhe me porosi

ZËVENDËSKRYEMINISTRI  
BELINDA BALLUKU

MINISTRI I BUJQËSISË  
DHE ZHVILLIMIT RURAL

ANILA DENAJ

## SHTOJCA 1

**Vlerat maksimale për përqendrimin e elementeve në terrenet kultivuese ose substraktet kultivuese**  
(në mg/kg lëndë e thatë, në një mostër përfaqësuese të tokave)

Metali dhe simboli kimik	Vlera maksimale (në mg/kg)
Antimon (Sb)	2
Arsenik (As)	5
Mërkur (Hg)	0.5
Kadmium (Cd)	1
Kobalt (Co)	20
Krom (Cr)	100
Bakër (Cu)	100
Plumb (Pb)	60
Nikel (Ni)	50
Zink (Zn)	200
Vanadium (V)	100

NR.PROT. 230/3  
DATË 22.1.2025

MINISTRISË SË BUJQËSISË DHE ZHVILLIMIT RURAL  
MINISTRISË SË SHËNDETËSISË DHE MBROJTJES  
SOCIALE  
AGJENCISË KOMBËTARE TË KONTROLLIT TË  
*CANNABIS-IT*  
QENDRËS SË BOTIMEVE ZYRTARE

Sekretari i Përgjithshëm

Engjell AGACI

